



Brčko Distrikt ima šansu za novi početak ukoliko djeluje odmah

Prvi zamjenik visokog predstavnika i supervizor za Brčko Distrikt, Michael Scanlan, prisustvovao je 23. decembra konstituirajućoj sjednici Skupštine Distrikta. Pohvalio je političke predstavnike Brčkog što su ispunili svoje obećanje i kompletirali formiranje vlasti prije kraja godine. Također je čestitao novoizabranim zvaničnicima Vlade i Skupštine Distrikta.

„Sada je vrijeme da se ubrza napredak na reformama usmjerenim ka dobrom upravljanju, razvoju infrastrukture i rastu privatnog sektora. Jak budžet Distrikta, strateški ekonomski položaj i neovisnost u donošenju odluka znače da bi Brčko trebalo imati najbolji zdravstveni i obrazovni sistem, infrastrukturu i poslovno okruženje u BiH. Danas smo čuli da su to ciljevi novoizabranih vlasti, i bit će vidljivo iz njihovih postupaka u naredna tri mjeseca je li to zaista tako,“ rekao je Supervizor.

Dan ranije, Scanlan je imao niz sastanaka o pozitivnim reformama koje su u toku u Distriktu. S vršiteljem dužnosti gradonačelnika Antom Domićem razgovarao je o statusu nacrtu zakona o sukobu interesa, važnosti razvoja kompaktne i efikasne javne uprave, posvećene pružanju usluga, te provedbi transparentnog i fiskalno odgovornog budžetskog procesa u 2021. godini.

Prilikom posjete Luci, supervizor je izrazio zadovoljstvo zbog informacije koju je primio od direktora Luke Marinka Viljušića i njegovog zamjenika Alije Osmanbašića da je prvi tender u okviru projekta modernizacije Luke Brčko objavljen ovog mjeseca, da će tender za dizalicu biti objavljen u januaru, a za izmjene na pristupnom putu i željezničkoj pruzi u februaru. Sa ispunjenjem ovih koraka, stanovnici Brčkog trebali bi vidjeti početak građevinskih radova u Luci krajem proljeća.

Na sastanku sa predstavnicima JP „Komunalno Brčko“, direktorom Kemalom Atićem, zamjenicom direktora Brankom Đurić, te predsjednikom Upravnog odbora Petrom Domićem, supervizor je pohvalio njihove napore na osiguranju dvogodišnjeg ugovora o isporuci električne energije za Distrikt. Razgovarali su o tome kako ovaj dvogodišnji period iskoristiti da se u Distriktu usvoje novi zakoni o električnoj energiji, obnovljivim izvorima energije i energetske efikasnosti, što će podstaći nove investicije u energetske sektor u Distriktu. Nadalje, implementacija

nedavno odobrene investicije od 1,5 miliona KM za proširenje elektro-infrastrukture pomoći će da se uspostavi povoljna klima za rast poslovnog sektora, a što će doprinijeti i podizanju životnog standarda za sve stanovnike Distrikta, dodao je supervizor.

Na sastanku sa direktoricom za korporativne komunikacije „STUDEN & CO Holdinga“ Natašom Pucar, supervizor Scanlan je informiran da je Vlada Distrikta nedavno pokrenula javnu raspravu o specijalnoj pogodbi u okviru memoranduma koji su potpisali Vlada Distrikta i „STUDEN & CO Holding“. Supervizor je rekao da će, bez obzira na to koji privatni investitor podnese najbolju ponudu, napredak u realizaciji ove javno-privatne inicijative u januaru poslati jasan signal svim investitorima da je Brčko otvoreno za poslovanje. Supervizor je također istaknuo ključnu ulogu koju ima Privredna komora u promicanju jednakog i fer poslovnog okruženja za sve poslovne subjekte u Distriktu.

U srijedu ujutro, supervizor je održao sastanke sa šefom Policije Brčko Distrikta Goranom Pisićem i glavnim tužiocem Zekerijom Mujkanovićem. Čestitao je njima i njihovom osoblju na efikasnim istragama vezanim za nepravilnosti u pripremama za izborni proces, te ih pozvao da isti pristup sada primijene i na slučajeve korupcije. „Preventivne mjere protiv korupcije i procesuiranje takvih slučajeva je posao broj jedan za vlasti, organe provođenja zakona i građane u ovom mandatu. Građani trebaju prijaviti sve slučajeve korupcije kojim posvjedoče ili koje iskuse organima za provođenje zakona, koji će onda provesti istragu. Niko ne smije biti iznad zakona u Distriktu,“ dodao je supervizor.